

Il cor da la chasa

TvR e RR tematischeschan la pigna scalegl

■ (anr) **La pigna en stiva è il cor da la chasa. En ses film ed en sia emissiuun sa deditgeschan Andreas Joos da la TvR e Maria Cadruvi dal RR ad ina sort da pigna tut speziala, la pigna scalegl.**

«Il cor da la chasa» sa numna il pli nov film da la Televisiun Rumantscha (TvR): *Andreas Joos*, redactur tar la TvR, è ò a la tschertga dal chaud en differentas stivas grischunas. Ma el è era stà a filmar en la chava da crap scalegl a Mompé Medel ed el ha observà en il lavuratori co ch'il crap scalegl vegn taglià e preparà per ina pigna nova. La maschaida da l'atmosfera empernaivla en stivas chaudas sa baratta en il film cun las lavurs da canera en chava e lavuratori, quai che dat al film da 25 minutas in agen tempo e ritmus.

Ina part da la cultura populara

La pigna scalegl è stada – cunzunt en Surselva – decennis a la lunga ina part da la cultura populara. Avant circa 50 onns, cura che stgaudaments dad ieli èn daventads moda, èn bleras pignas scalegl svanidas ord las stivas sursilvanas. Oz èn ellas puspè dumandadas ed ils tschentapignas che fan sin mesira pignas ord scalegl indigen han blera lavur. *Giusep e Rita Lutz-Castelberg* da Disla dasper Mustér han per fortuna empustà ad uras lur pigna nova. Ed els l'han era survegni avant che l'enviern vegnia. Ina pigna scalegl han els già adina en lur stiva. Mo che lur pigna veglia ha stuè vegnir disfatta per motivs da segirtad. Ella era arsa ora. Il film musa co che la pigna da 170 onns vegn demolida ed il film documentescha era la montascha dad ina pigna nova en il medem lieu. In chaud empernaivel derasa il



Maria Cadruvi ed Andreas Joos, ils auturs da las emissiuuns davart las pignas scalegl.

FOTO F. ANDRY

film era cun mussar pignas scalegl ordai fer la Surselva: ina pigna moderna en ina chasa da minergia a Haldenstein, ina pigna veglia a Salouf e schizunt duas pignas novas en ina chasa a Sent. Il film dad Andreas Joos è dal reminent ina lavur da VJ. Quai vul dir ch'il redactur da TvR è stà en il medem mument autur, um da camera ed um dal tun dal film.

Istorgias da pignas scalegl en il radio

Maria Cadruvi, redactura tar il Radio Rumantsch (RR), ha fatg tar il tema «pignas scalegl» in' emissiuun da radio dad ina

mes'ura che vegn medemamain emessa dumengia (ils 29 d'october) en «La Marella». Il titel: «Quella na dessan nus mai davent». Manegià è natiralmain la pigna scalegl. La schurnalista dal RR è ida a Mompé Medel quasi da chasa tar chasa a «rimnar» istorgias da pignas scalegl. En l'emissiuun vegnan questas istorgias enramadas dad infurmaziuns sur dal crap scalegl dad in geolog.

Datas d'emissiuun: RR: 29 d'october, 12.30 e 30 d'october, 14.03. TvR: 29 d'october, 17.25 e 4 da november, 17.15, mintgamai sin SF 1 cun suttitels tudestgs.